

Graduadonan di estudio Master den idioma ta presenta nan tesis

LUNA di october ta proclama pa Minister di Enseñansa y Famia como Luna di Enseñansa. Biblioteca Nacional Aruba a haci uzo di e ocasion aki pa invita e prome graduadonan di Aruba di estudio Master di idioma pa comparti cu docentenan y tur otro interesado den e materia e trabou grandi cu nan a haci cu a resulta den nan tesis Master.

Durante 2 atardi, esta diamars 20 di october y diamars 27 di october ocho di e graduadonan ta presenta nan tesis.

Diamars 20 di october ta presenta sr. Willem Bant, MEd den Spaño, sra. Ryma Rincones-van der Linden, MEd den Hulandes, sr. Cedrick Kelly, MEd den Papiamentu y sr. Cesar Kelly, MEd den Papiamentu.

Diamars 27 di october ta toca turno na sra. Swinda Arendsz-de Cuba, MEd den Papiamentu, sra. Maureen Molina-Luidens, MEd den Papiamentu, sra. Zulaika Fernandes Perna-Silva, MEd den Papiamentu y sra. Endrah Richardson-Gumbs, MEd den Ingles.

Number oficial di e estudio ta HBO-master idioma. E estudio aki tin un duracion di 2 aña. Por haci e estudio Master den 4 idioma, esta Papiamentu, Hulandes, Ingles y Spaño.

Personanan cu por haci e estudio aki ta personanan cu un Bachelor den un di e idiomanan menciona of un formacion ekivalente. E estudio aki ta existi for di 2009 na Universidad di Corsou.

P-e estudio di aña 2013 pa 2015 Universidad di Corsou (UOC) a



habri e posibilidad p-e studiantenan di Aruba sigui e estudio online via Blackboard collaborate y Smartboard. Instituto Pedagogico Arubano (IPA) a facilita espacio y infraestructura digital n-e studiantenan. FDA a duna un aporte financiero pa Aruba.

A crea un cooperacion unico entre Universidad di Corsou, sucursal di UOC na Boneiro y IPA. Den practica esaki tabata nifica cu e docente ta duna su college na un di e tres islanan y e studiantenan n-e otro dos islanan ta sigui e college hunto den klas via e sistema digital. E sistema ta haci posibel tambe p-e studiantenan por comunica cu e docente y cu e otro studiantenan.

E docentenan tabata bishita un

bes pa modulo e otro islanan pa cera conoci cu e studiantenan. Tabatin docente di Aruba, Corsou, Boneiro, Puerto Rico, Hulanda, Suiza y Polonia.

Na Aruba a cuminsa un grupo di 32 estudiante y 1 observador. Algun estudiante a cay afo den transcurso di e estudio y na final tabatin 27 estudiante: 12 pa Papiamentu, 7 pa Hulandes, 5 pa Ingles y 3 pa Spaño.

*Na juni 2015
a gradua 10 estudiante,
6 pa Papiamentu, 1 pa
Hulandes, 1 pa Ingles y 2
pa Spaño. Na september a
gradua un mas pa Spaño.
Y tin mas graduado na
caminda.*

Biblioteca Nacional Aruba, en especial departamento Arubiana/Caribiana, ta hopi orguyoso di por presenta 8 di e tesisnan Master.

Durante dos atardi e graduadonan, 4 pa cada atardi, ta presenta e trabou y investigacion cu nan a haci pa yega na nan tesis. Tin oportunidad pa haci pregunta.

E presentacionnan ta tuma luga na departamento Arubiana/Caribiana na Bachstraat 5, Oranjestad, di 5.30 pa 7.30 di atardi.

Un invitacion ta bay na un y tur, en especial docentenan y tur hende cu ta traha cu maneho di idioma, pa participa n-e atardinan di presentacion.